



UPA 2014/109
20.05.2014
Mimi Karlsen

Kalaallit Nunaata Nunavullu allaffissornikkut politikikkullu suleqatigiinnerulersinnaanerannut periarfissat pillugit kiisalu niueqatigiinnerulersinnaanermut periarfissat pillugit nassuiaasiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Doris Jakobsen, Siumut)

Siunnersuuteqartup Doris Jakobsen, Siumumeersup tungavilersuutigaa Nunavummiullu naggueqatigiittut kulturikkut attaveqaativut annertoorujussuusut, kisiannili politikikkut, allaffissornikkut niuernikkullu suleqatigiinnerput anner-tugisassaangitsoq.

Naggueqatigiilluta, oqaaseqatigiilluta, ilaatigullumi ilaqutariilluta Nunat killeqar-filersornerisigut avissaartitaasimavugut. Tamannalu ukiorpassuarni atuummat ernumanartarpoq kinguaatta tamanna pingaartinnagulu puigoqinammassuk. Uagullu pingaartitarigutsigu naggueqatitta attaviguarnissaat suleqatigiinner-mittaaq pilersitsisariaqarpugut.

Suleqatigiissutigisinnaasagut amerlaqaat. Pingaarnertulli taasinnaavagut oqaat-sigut, inooriaaserput, uumasunik, nunamik immamillu atueriaaserput. Inuunermik isiginneriaaserput. Ilami assigiimmik isiginneriaaseqarnerput euro-pamiut isiginneriaasianik allaanerusinnaasoq, taamaammallu ilaanni illersor-tariaqartagarput. Tassa tamakkorpassuusinnaapput suleqatigiissutigisinnaa-sagut.

Ilinniartitaanertaaq suleqatigiiffigisinnaavarput. Tamattami inukitsormiuusugut issittormiuusugullu ilinniartitaanermi ikioqatigiissutissaqassaqaagut. Europamiut ilinniartitseriasiat naggueqatigullu atorparput, naak ilaatigut uagut Inuttut allatut ilikkartaaseqarsinnaallutalu paasinnissinnaagaluarluta. Tamakkuusaria-qarpullu ataatsimoorullugit ilisimatusarfigisinnaasagut, kingornalu meerartatta ilinniartifinni inooriaatsimik akuerineqartumik paasineqarsinnaasumillu tunulia-quteqarlutik ilinniartifigisinnaasaannik pilersitsiviusinnaasoq.

Taariikkatsituut Nunanit allanit nunasiaataasimavugut, taakkulu allaffissornikkut kingornutassiissutaat tamatta immikkut ingerlallutigit. Taamaammat ullumikkut Nunavumi Nunatsinnilu allaffissornerit assigiinneqaat, ilaatigullumi assigiif-feqaratik.

Niuernikkut soqutigisat assigiissinnaapput, niuerutissagullu assigiinngitsut pilerinartarlutik. Eqqarsaatigiinnaraannimi Europamiit atortussagut tikisit-takkagut, uffa immaqa nunanit qaninnerusunit, Nunavumit aamma tikisitsinnaagaluarluta. Tassa niuernikkut periarfissarsiornissarput kissaa-tiginarpoq.

Maannakkut naggueqatigiulluta suleqatigiiffipput kattuffipullu ICC eqqaan-ngitsoorneqarsinnaanngilaq. Ukiorpaaluttunngortuni taannatuaajuarpoq uagut Inuit ataatsimoorfituarput, nunarsuarmioqatitsinnit akuerisaasoq. Taamaammat Inuit Ataqtigiit pingaartippaat kattuffiup taassuma pisortatigoortumittaaq tapersersorneqarnissaa.

Taamatuttaaq aamma isigaarput Arktisk Rådimi sulineq, minnerunngitsumillu Nordisk Rådimi sulineq tapersersortuartariaqaripput isumaqarpugut.

Taama naatsumik oqaaseqarluta Doris Jakobsen siunnersuutaa Inuit Ataqtigiit taperserpaat ataatsimiitsitaliamullu susassaqtumut ingerlateqqikkumallugu.